

Bagi pastikan Insaniah dapat menampung kos pengurusan, kualiti program

Kaji semula peruntukan – Sultan

Oleh SAFINA RAMLI
utusankedah@utusan.com.my

ALOR SETAR 19 Okt. – Sultan Kedah, Tuanku Abdul Halim Mu'adzam Shah meminta agar Menteri Besar, Datuk Seri Azizan Abdul Razak mengkaji semula peruntukan yang diterima oleh Kolej Universiti Insaniah (Insaniah).

Baginda bertitah, ini bagi memastikan Insaniah mendapat peruntukan yang munasabah untuk mengimbangkan kapasitinya dengan tanggungjawab kolej tersebut.

“Sejajar dengan perkembangan pesat Insaniah, tidak dapat dinafikan Insaniah memerlukan peruntukan yang lebih besar untuk menampung kos pengurusan dan kos untuk menjamin kualiti program pengajian bertaraf global.

“Beta yakin dengan memberi perhatian yang sewajarnya kepada peruntukan yang seimbang, semua usaha kesinambungan dan pembangunan terkini dapat ditangani,” titah baginda.

Baginda bertitah demikian pada Majlis Konvokesyen Insaniah Ke-12 di sini, hari ini.

Pada majlis tersebut seramai 617 graduan berjaya memperoleh ijazah sarjana dan diploma masing-masing.

Titah baginda, pertambahan pelajar pada tahun ini sebanyak dua kali ganda iaitu kepada 6,591 orang berbanding 3,836 pada tahun lalu adalah satu fenomena yang perlu ditangani dengan baik oleh semua pihak.

“Pihak yang bertanggungjawab perlu mengambil tindakan sewajarnya bagi menjamin kestabilan, ke-selesaian dan kesempurnaan persekitaran serta pembelajaran.

“Setiap perkembangan di Insaniah perlu dirancang dan dihalusi segenap aspek pelaksanaannya agar tidak ada ketempangan yang berlaku di mana-mana bahagian,” titah baginda.

Dalam pada itu, Tuanku Abdul Halim bertitah, para graduan Insaniah perlu sentiasa menampilkan akhlak mulia sekali gus menjaga nama baik diri, keluarga, Insaniah dan agama.

“Setelah bergelar alumni Insaniah, beta berharap bekas pelajar akan sentiasa berusaha menyumbang buah fikiran dan berkongsi pengalaman untuk memantapkan lagi Insaniah,” titah baginda.



TUANKU Abdul Halim Mu'adzam Shah menyampaikan Anugerah Jaizah Imtiyah (Tuanku Canselor) kepada Ammar Badruddin Romli pada Majlis Konvokesyes Ke-12 Kolej Universiti Insaniah di Alor Setar, semalam.